

Historia di Antaño, pa Museo Antigüedad Aruba.

Kisas esakinan porta bunita storianan di Aruba cu bo por conta bo jiu

E piedra di mula.

Esaki ta un piedra natural cu ta wordo usa pa mula maishi riba dje cu un **manga**. Mi por pone e maishi rabo riba e piedra di mula. E manga tambe ta di piedra y cu esaki bo por mula e maishi cu un movimiento special di e manga riba e piedra. E piedra di n ta casi plat den principio, despues di tempo e ta bira mas hundo segun e wordo usa. Tambe e manga ta haña un forma mas rondo cu bo por tene y usa cu mas facilidad. Mi ta mula e maishi fini fini y asina e ta bira hariña. Cu e por bati pan, traha bojo of prepara un dushi papa.



E burico.

E animal noble aki tabata hopi importante pa nos Arubianonan den siglonan 18 y 19. Esaki tabata e caso na hopi paisnan den cercania tambe. E burico a wordo usa como medio di transportacion como tambe animal di carga. Sigur cu e tabata un propiedad hopi valioso.

Ariba e burico mi ta pone un **hero di halifat**

y na cada banda mi ta colga un **halifat** pa

carga awa for di pos. Ora mi jega cas mi ta pone

e awa den un **tinashi**, esaki ta e awa di reserva. E tinashi ta traha di klei y ta mantene e awa fresco. Tin hende a hinca e tinashi den tera (buraco) pa asina e awa keda na un bon temperatura.

Den mi cas tin un **mesa di awa** y riba dje tin un **purun**.



For di e tinashi mi ta saca awa pone den e purun cu un **cuchara traha di coco of calbas**. Asina mi tin awa fresco pa mi bebe henter dia den mi cas y tur cu kier bishitami.

